

AL-HIKMAH

Jilid
Volume

6

ISSN 1985-6822

2014M
1435H

- Faktor Gangguan Emosi alam Fenomena Histeria Massa Remaja Muslim ...3-20
INTAN FARHANA SAPARUDIN, FARIZA MD.SHAM & SALASIAH HANIN HAMJAH
- Pendekatan Dakwah melalui ‘Konsep Cinta Muslim’ dalam Menangani Masalah Sosial ...21-34
SYAIDATUN NAZIRAH ABU ZAHRIN, REZKI PERDANI SAWAI, MOHD SHARUL FAIZIE ZAINI & ALLAWATI KASRI
- Kajian Pembangunan Insan dari Aspek Jati Diri terhadap Pesakit di Pusat Terapi Pyra Cosmic, Subang, Jaya Selangor ...35-50
ARIFIN MOHAMED & FAKHRUL ADABI ABDUL KADIR
- Nilai Spiritual dalam Puisi Imam Shāfiʿī ...51-65
KHAZRI OSMAN & SITI RUGAYAH HJ. TIBEK
- Tahap Kefahaman, Penerimaan dan Integrasi Golongan Muallaf Cina Terhadap Kebudayaan Masyarakat Melayu di Negeri Selangor ...66-77
SYAHRUL AZMAN SHAHARUDDIN & RAZALEIGH MUHAMAT @ KAWANGIT
- Penyesuaian Diri Muallaf Terhadap Masyarakat dalam Kalangan Pelajar Institut Dakwah Islamiah PERKIM (IDIP) ...78-93
MARLON P. GULENG, RAZALEIGH MUHAMAT@KAWANGIT & ABU DARDAA MOHAMAD
- Idea Pembaharuan Agama Birgivi Dalam *Al-Tariqah Al-Muhammadiyah* ...94-106
HASRIZAL ABDUL JAMIL & AZMUL FAHIMI KAMARUZAMAN
- Penilaian Kepada Koperasi Sekolah dalam Membentuk Gaya Kepimpinan Pelajar Satu Kajian Awalan ...107-121
ROHAIDA MOHAMAD DHALAN & RAZALEIGH MUHAMAD @ KAWANGIT
- إشكالية التطرف السياسي والديني وعلاقته بالإرهاب ...122-135
علي عمر مفتاح ميدن
- ULASAN BUKU/BOOK REVIEW ...136-140

Pendekatan Dakwah Melalui ‘Konsep Cinta Muslim’ Dalam Menangani Masalah Sosial Remaja

SYAIDATUN NAZIRAH ABU ZAHRIN
REZKI PERDANI SAWAI
MOHD SHAHRUL FAIZIE ZAINI
ALLAWATI KASRI

ABSTRAK

Seringkali kita mendengar ungkapan “Cinta itu buta” yang membawa kepada masalah sosial seperti perzinaan, pembuangan bayi dan pembunuhan. Hakikatnya, mereka yang terlibat dalam masalah ini kurang memahami tentang konsep cinta sebenar dari perspektif Islam. Oleh yang demikian, kajian konseptual ini akan membahaskan konsep cinta Muslim serta menghuraikan konsep cinta dari perspektif Islam dengan merujuk kepada Qur’an dan Sunnah. Kefahaman terhadap konsep ini dapat menyedarkan pelbagai lapisan masyarakat mengenai kepentingan untuk kembali kepada ajaran Islam dalam menangani masalah sosial. Mendidik konsep cinta Muslim kepada remaja Islam amatlah penting dan boleh diterapkan melalui pelbagai mekanisme dakwah. Antaranya media cetak, media massa, ceramah, syarahan dan forum, facebook, twitter, instagram dan sebagainya. Dapatan kajian memperlihatkan bagaimana cinta kepada Allah SWT dan cinta kerana Allah SWT akan dapat mengawal perlakuan cinta yang boleh membawa kepada gejala sosial.

Kata kunci: Konsep Cinta Muslim, masalah sosial, pendekatan dakwah

PENDAHULUAN

Persoalan tentang istilah cinta sering berlegar-legar di fikiran individu, sama ada golongan remaja, mahupun dewasa. Ingin dicintai, disayangi dan dimiliki merupakan fitrah manusia yang dianugerahkan oleh Allah SWT. Walaupun ada kalanya sukar untuk dilafazkan dengan lidah secara terang-terangan, tetapi jauh di sudut hati terdengar jeritan yang berbunyi “Aku ingin dicintai!”. Inilah hakikat cinta, saban hari manusia mencari pengertian mengenainya, saban hari manusia memburu cinta dengan pelbagai cara, teknik dan pendekatan. Pendek kata, kita tidak dapat menafikan kepentingan cinta dalam kehidupan.

Namun, masalah timbul apabila individu berusaha untuk mencintai dan dicintai sehingga mereka lupa kepada tuntutan syariat dan kepentingan memelihara akhlak sepanjang pencarian tersebut. Cinta romantik yang tidak dilandasi dengan iman membawa kepada perlakuan zina sehingga ada yang sanggup membuang bayi (Utusan Online, 25 Mei 2010, 7 Jun 2010, 29 Jun 2010, 13 Ogos 2010, 15 Ogos 2010), rogol dan sumbang mahram yang kian menjadi-jadi (Utusan Malaysia, 7 Mei 2008, 27 Mei 2008, 6 Jun 2008). Lantaran itu, pengkaji berpendapat betapa pentingnya untuk mendidik generasi muda Islam supaya memahami hakikat cinta sebenar atau hakiki untuk mengelakkan diri mereka dan orang lain dari jatuh ke lembah kehinaan.

DEFINISI KONSEP CINTA MUSLIM

Apa itu Cinta

Menurut Kamus Dewan (1996), cinta ialah perasaan atau berperasaan sangat sayang terhadap sesuatu seperti negara, ibu bapa, kebebasan dan lain-lain. Cinta juga didefinisikan sebagai kecenderungan seluruh hati yang terus-menerus kepada yang dicintai. Cinta dalam erti kata yang sebenar amat global dan umum merangkumi cinta hamba kepada Pencipta-Nya, cinta sesama manusia, bapa dan sebaliknya, cinta sesama saudara se-Islam, cinta kepada kebahagiaan dan cinta kepada kesenangan. Namun hari ini, istilah cinta telah disalahertikan dengan mengatakan bahawa cinta itu hanyalah terbatas kepada percintaan di antara lelaki dan perempuan. Amat menyedihkan lagi apabila cinta tersebut telah disalahgunakan oleh golongan yang belum berkahwin kerana darah dara dan teruna masih panas dan manis dalam diri mereka.

Konsep Cinta Muslim

Konsep Cinta Muslim ini adalah kajian cinta yang dilakukan secara saintifik dan Islamik dengan menghimpunkan ayat-ayat Qur'an, hadith-hadith Rasulullah SAW, penulisan ulama-ulama Islam dan kajian-kajian ahli Psikologi. Konsep Cinta Muslim memberi gambaran yang jelas bahawa cinta mempunyai pelbagai definisi, jenis, tahap dan tingkatan. Sifat cinta juga berbeza mengikut keadaan dan suasana kehidupan. Meskipun pengertian dan definisi cinta adalah pelbagai, cinta menurut Islam adalah berlandaskan kepada kecintaan kepada Allah SWT dan Rasulullah SAW. Garis panduan bercinta kepada sesama makhluk dan juga Pencipta telah termaktub di dalam Qur'an dan Sunnah.

Di dalam mengkaji Konsep Cinta Muslim, terdapat pelbagai jenis, sifat dan tahap cinta yang telah dapat dikesan dalam kehidupan individu.

Berikut dinyatakan beberapa jenis cinta dan aplikasinya dalam kehidupan sehari-hari:

a) Cinta Ibadah

Cinta ibadah adalah merujuk kepada kecintaan yang menyebabkan timbulnya perasaan kehambaan dan merasakan kebesaran Pencipta, mengagungkan-Nya serta bersungguh-sungguh dalam menjalankan segala perintah dan menjauhi segala larangan-Nya (Maszlee 2007). Surah al-Baqarah (2), ayat:165;

Maksudnya:

“... (Walaupun demikian), ada juga di antara manusia yang mengambil selain daripada Allah (untuk menjadi) sekutu-sekutu (Allah), mereka mencintainya, (memuja dan mentaatinya) sebagaimana mereka mencintai Allah; sedang orang-orang yang beriman itu lebih cinta (taat) kepada Allah...”

Cinta ini juga seharusnya disempurnakan dengan kecintaan yang mendalam terhadap Rasul utusanNya, Nabi Muhammad SAW. Baginda merupakan insan yang amat mencintai serta menyayangi umatnya. Baginda jualah yang akan membantu umat Islam apabila tibanya hari pembalasan yang dijanjikan. Cinta baginda inilah anugerah kudus ciptaan Allah SWT (Nik Abdul Aziz 2008). Surah ali-Imran (3), ayat: 31;

Maksudnya:

“Katakanlah, jika kamu menyintai Allah, maka ikutilah aku nescaya Allah akan mengasihimu...”

Kemuncak kepada cinta ibadah ialah kecintaan kepada Allah SWT dan Rasul-Nya. Cinta yang demikian merupakan pokok keimanan dan tauhid yang mana pelakunya akan dianugerahi keutamaan yang tidak terhingga. Cinta sesama manusia juga dianggap sebagai cinta ibadah, contohnya kasih sayang ibu bapa terhadap anaknya, sayangnya seseorang kepada fakir miskin dan orang sakit, cinta suami kepada isteri, cinta sesama saudara Islam dan sebagainya. Allah SWT telah berfirman dalam surah al-Fath 48: 29;

Maksudnya:

“... Nabi Muhammad SAW ialah Rasul Allah; dan orang-orang yang bersama dengannya bersikap keras dan tegas terhadap orang-orang kafir yang (memusuhi Islam), dan sebaiknya bersikap kasih sayang serta belas kasihan kasihan sesama sendiri (umat Islam)...”

b) Cinta Maksiat

Cinta maksiat membawa maksud cinta yang tidak bersandarkan cinta kepada Allah SWT (Maszlee 2007). Ini dapat difahami dengan jelas bahawa cinta maksiat berlaku apabila seseorang individu mencintai perkara yang dibenci oleh Allah SWT. Contohnya, mencintai pasangan yang bukan mahram tanpa menjaga batas pergaulan. Cinta seperti ini hanya akan membawa kepada kemurkaan Allah SWT. Dalam surah al-Isra' (17), ayat :32;

Maksudnya:

"Dan janganlah kamu menghampiri zina, sesungguhnya zina itu adalah satu perbuatan yang keji dan satu jalan yang jahat (yang membawa kerosakan)"

Cinta seperti inilah yang menjadi ikutan anak muda masa kini. Perasaan ingin bercinta, dicintai dan dimiliki semakin kuat didorong oleh pelbagai faktor seperti pengaruh rakan sebaya, pengaruh media massa dan sebagainya. Remaja disogok dan dibuai keindahan cinta romantik tanpa batasan.

CINTA REMAJA MUSLIM

Terdapat pelbagai hukum bercinta dalam Islam, disamping pandangan berkaitan hal ini, antaranya cinta semasa remaja boleh dijalinkan asalkan masing-masing tahu bagaimana untuk mengawal perasaan cinta tersebut dan dalam masa yang sama menjaga adab dan tidak melangkaui batasan yang telah ditetapkan oleh Syariah. Hubungan cinta di antara lelaki dan wanita merupakan sesuatu yang sukar dielakkan kerana wujudnya daya tarikan di antara mereka yang berlainan jantina (Hanisah et al.2013). Perhubungan ini seharusnya membawa kesan yang positif bagi remaja kerana mereka mempunyai pendorong untuk memberi galakan atau persaingan dalam bidang pelajaran selain daripada ibu bapa mereka yang sentiasa mendoakan kejayaan mereka.

Namun, remaja haruslah mengamalkan sikap berhati-hati dan tidak melanggar batasan adat timur dan agama semasa bercinta. Akhlak percintaan perlu sentiasa dijaga dan dipertahankan. Ramai pasangan yang melafazkan cinta, tetapi sebenarnya mereka tidak mengetahui mengapa mereka bercinta dan bagaimana untuk menjaga akhlak mereka supaya tidak terjerumus ke lembah perzinaan. Masih ramai yang tidak mengetahui apakah hakikat cinta sebenar dan bagaimana untuk menjadikan ikatan cinta yang dijalin berkekalan sehingga ke jinjang pelamin. Kekurangan pemahaman mengenai konsep cinta sebenar menyebabkan segelintir pasangan muda menyatakan perasaan cinta dan

keinginan untuk disayangi dengan cara salah yang mengarah mereka kepada perbuatan haram khususnya zina (Hanisal et al. 2013). Justeru, kefahaman tentang konsep cinta di antara lelaki dan wanita perlu diketahui secara mendalam agar hubungan cinta yang dijalin tidak membawa kepada kekecewaan dan kemusnahan.

Ajaran Islam telah diturunkan oleh Allah SWT untuk memasang bingkai agar kemahuan manusia itu dapat disalurkan dengan cara yang terbaik melalui perkahwinan. Islam menutup rapat jalan kemaksiatan dan membuka seluas-luasnya jalan menuju ketaatan serta memberi dorongan kuat ke arah perlaksanaannya. Rasulullah SAW pernah mengecam salah seorang sahabat yang bertekad untuk tidak bernikah. Sebaik-baik cinta adalah cinta yang berputik dan berkembang selepas perkahwinan kerana mereka akan dapat menjaga kehormatan diri serta beroleh keberkatan dalam perkahwinan kerana mengikut Sunnah Rasulullah SAW.

KONSEP CINTA MUSLIM SEBAGAI INTIPATI DAKWAH

Bagaimana kita mampu menjadikan kefahaman terhadap konsep cinta Muslim sebagai intipati dakwah kepada masyarakat? Para pendakwah perlu melengkapkan diri dengan sebaiknya dalam mengharungi tribulasi cinta “fitrah” ini. Para pendakwah perlu bersikap lebih terbuka dalam membincangkan soal cinta terutamanya apabila berhadapan dengan remaja. Kempen “Anda bijak, jauhi zina” yang dipelopori oleh pengasas Raudahatus Sakinah merupakan salah satu cara terbaik dalam menyampaikan konsep cinta sebenar kepada remaja. Pendekatan dakwah yang ingin dilaksanakan haruslah mampu menarik perhatian remaja melalui penggunaan ICT yang semakin canggih pada hari ini.

KESEDARAN CINTA SEBAGAI BENTENG GEJALA MAKSIAT

Pendekatan contoh ialah usaha dakwah dalam menjuruskan perbuatan sebagai agen untuk menarik masyarakat (al-Bayanuni 2007). Bagi pasangan yang bercinta, mereka seharusnya menjadikan cinta mereka sebagai aset dakwah. Bagaimana ia dapat dijadikan sebagai aset dakwah? Menurut Al-Bayanuni (2007), *mad'u* atau masyarakat akan mudah terpengaruh dengan tindak-tanduk seseorang yang dilihatnya sesuai. Ini bermakna sekiranya pasangan remaja Muslim yang sudah melafazkan cinta sesama mereka menjaga kesucian cinta dengan mematuhi hukum dan batasan pergaulan serta bercinta berpaksikan cinta kepada Allah SWT, nescaya masyarakat akan terikut dan mencontohi perlakuan mereka. Terdapat beberapa perkara yang perlu dititikberatkan

oleh pasangan remaja yang sedang bercinta. Islam mesti diambil seawal langkah yang pertama (Hasrizal 2009). Firman Allah SWT dalam surah al-Baqarah (2), ayat: 208;

Maksudnya:

“Wahai orang-orang yang beriman! Masuklah kamu ke dalam agama Islam (dengan mematuhi) segala hukum-hukumnya; dan janganlah kamu menurut jejak langkah Syaitan. Sesungguhnya Syaitan itu musuh bagi kamu yang terang nyata”.

Pasangan remaja yang ingin bercinta dan memelihara cinta tersebut di samping menjadikan cinta mereka sebagai agen dakwah haruslah melaksanakan beberapa panduan yang telah diaturkan dengan cukup sempurna oleh Allah SWT iaitu:

a) Menundukkan pandangan

Menundukkan pandangan bermaksud memelihara penglihatan daripada melihat perkara yang haram, merangsang nafsu dan mengundang diri kepada zina. Firman Allah SWT dalam surah al-Nur (24), ayat:30;

Maksudnya:

“Katakanlah (wahai Muhammad) kepada orang-orang lelaki yang beriman supaya mereka menyekat pandangan mereka (daripada memandang yang haram), dan memelihara kehormatan mereka. Yang demikian itu lebih suci bagi mereka; sesungguhnya Allah amat mendalam pengetahuannya tentang apa yang mereka kerjakan”

Wanita-wanita yang beriman juga diberikan saranan yang sama. Di dalam ayat yang menyusul perintah di atas, Allah SWT memerintahkan kaum wanita seperti kaum lelaki, sama-sama memelihara pandangan daripada melihat apa yang tidak diharuskan baginya melihat.

b) Memelihara aurat

Menundukkan pandangan daripada perkara haram menjadi lebih mudah apabila perkara haram itu tercegah dalam daerah halalanya. Menjaga aurat adalah cara seseorang memuliakan dirinya sendiri dan menghormati orang lain. Allah SWT berfirman dalam surah al-Nur (24), ayat:31;

Maksudnya:

“Dan janganlah mereka memperlihatkan perhiasan tubuh mereka kecuali yang zahir daripadanya; dan

hendaklah mereka menutup belahan leher bajunya
dengan tudung kepala mereka...”

c) Tidak menonjolkan kecantikan Secara Ringkas

Menutup aurat adalah salah satu cara bagaimana Allah SWT mengajar kita membentuk diri. Dengan menutup aurat kita belajar sifat malu dan belajar mengenal batas-batas diri yang mewujudkan rasa berTuhan dalam kehidupan. Firman Allah SWT dalam surah al-Ahzaab (33), ayat: 33;

Maksudnya:

“Dan hendaklah kamu melazimkan diri berada di rumah kamu serta janganlah kamu mendedah, menghias dan menonjolkan diri seperti yang dilakukan oleh orang-orang Jahiliyah zaman dahulu”

Mungkin ada yang mengatakan mereka sudah bertudung, tetapi pada waktu yang sama solekan di bibir dan kelopak matanya begitu keterlaluan, kakinya memakai rantai berloceng hingga menarik perhatian sesiapa sahaja yang mendengarnya. Maka, sebagai individu yang takut kepada Allah SWT, seharusnya dia meninggalkan solekan, pakaian yang tidak bersesuaian dan barang kemas yang boleh menimbulkan fitnah ke atas dirinya.

d) Berurusan dengan batasan

Bagi pasangan yang sedang bercinta, pastinya mereka akan mencari peluang untuk bertemu. Bekerja, belajar, bermesyuarat, berjiran dan bermasyarakat, semuanya harus mengikut garis panduan Islam. Silang jantina perlulah mengenali matlamat dan tujuan. Kehendak atau kemahuan haruslah dikawal agar perhubungan yang suci terpelihara. Firman Allah SWT dalam surah al-Ahzaab (33), ayat: 53;

Maksudnya:

“Dan apabila kamu meminta sesuatu yang harus diminta daripada mereka maka mintalah kepada mereka dengan perantaraan hijab. Cara yang demikian lebih suci bagi hati kamu dan hati mereka”

Hijab yang dimaksudkan oleh ayat di atas sama ada berupa tabir yang fizikal atau sekurang-kurangnya mengekalkan batas pergaulan di antara lelaki dan perempuan. Islam tidak melarang untuk kita bermesyuarat tetapi biarlah tertakluk kepada batasan waktu, batasan aurat dan batasan pergaulan. Ketika berinteraksi dengan berlainan jantina, maka sewajarnya dielakkan suasana yang boleh menimbulkan fitnah seperti

bergurau senda yang keterlaluan, ketawa berdekah-dekah, menaikkan suara secara keterlaluan demi menegakkan satu-satu pandangan serta bermesyuarat hingga lewat malam.

e) Tidak melunakkan suara

Suara juga merupakan aurat bagi wanita. Jangan lunakkan suara semasa berbicara. Berbicaralah dengan nada bersahaja, sederhana dan tidak dibuat-buat. Allah SWT telah berfirman dalam surah al-Ahzaab (33), ayat: 32;

Maksudnya:

“Andaikata kamu benar-benar beriman, maka janganlah kamu lunak-lunakkan suara semasa berbicara. Nantinya orang-orang yang hatinya berpenyakit menjadi tamak. Justeru berbicaralah dengan perbincangan yang maaruf”

Apabila segala peraturan dan panduan yang telah diaturkan oleh Allah SWT ini dapat dilaksanakan dengan baik, nescaya jalinan cinta sesama manusia yang berpaksikan cinta kepada Allah SWT akan terpelihara daripada godaan nafsu dan syaitan yang tidak jemu-jemu ingin menyesatkan manusia. Justeru, amat penting bagi pasangan remaja Muslim memelihara kesucian cinta mereka kerana *mad'u* atau masyarakat yang melihat aturan serta perjalanan cinta pasangan tersebut pasti akan tertarik dan mengikutinya. Inilah yang dimaksudkan cinta remaja Muslim sebagai agen dakwah kepada masyarakat. Firman Allah SWT dalam surah al-Furqan 25:43-44;

Maksudnya:

“Nampakkah kamu keburukan keadaan orang yang menjadikan hawa nafsunya sebagai tuhan yang dipuja lagi ditaati? Maka dapatkah engkau menjadi pengawas yang menjaganya jangan sesat? Atau adakah engkau menyangka bahawa kebanyakan mereka mendengar atau memahami (apa yang engkau sampaikan kepada mereka)? Mereka hanyalah seperti binatang ternak, bahkan (bawaan) mereka lebih sesat lagi”.

MEKANISMA DAKWAH UNTUK MENDIDIK CINTA

Terdapat pelbagai cara yang boleh digunakan bagi mendidik masyarakat mengenai konsep cinta Muslim. Antaranya ialah melalui penulisan, ceramah, syarahan dan forum. Bermula alaf ke-21, semakin ramai pakar motivasi dan pendakwah bebas di Malaysia yang mula memperkatakan

soal cinta melalui buku-buku penulisan popular, ceramah, syarahan dan forum di media massa. Sebagai contoh, Dato' Dr. Mohd Fadhilah Kamsah (2004, 2005, 2006), Dr. HM Tuah Iskandar al-Haj (2002, 2005, 2008), Hasrizal Abdul Jamil (2008, 2009, 2010), Pahrol Juio (2006, 2009, 2010) dan Dato' Siti Nor Bahiyah (2005, 2006, 2009). Kehadiran pakar-pakar motivasi dan penceramah-penceramah bebas yang membahaskan soal cinta telah berjaya menarik pelbagai lapisan masyarakat untuk menghadiri forum-forum, ceramah, kursus-kursus kekeluargaan dan aktiviti-aktiviti kemasyarakatan.

Di samping penulisan buku, novel Islam yang berkisar kepada pelbagai bentuk cinta juga mampu mendidik golongan masyarakat khususnya remaja mengenai konsep cinta Muslim. Contoh novel Islam terkenal yang membicarakan tentang cinta Muslim ialah novel *Ketika Cinta Bertasbih* dan novel *Ayat-ayat Cinta* karangan Habiburrahman el-Shirazy. Kedua-dua novel ini lebih banyak menceritakan tentang cinta kepada Allah SWT yang melebihi segalanya, termasuklah cinta sesama manusia. Selain itu, ia juga memaparkan akhlak Islam dalam menjaga hubungan di antara bukan mahram seperti menutup aurat, menjaga pandangan, redha dan bertawakal dalam menghadapi ujian Allah SWT (Siti Isnaniah 2013). Namun, perlu diketahui bahawa media dari perspektif Islam itu haruslah bersifat menyeru kepada kebaikan dan mencegah kepada kemungkaran. Selain itu, media juga harus bersifat menyatakan sesuatu yang benar dan tidak memutarbelitkan kebenaran untuk kepentingan peribadi atau kumpulan tertentu (Zulkiple 2001; Najdah & Abu Dardaa 2013).

Mekanisma dakwah untuk mendidik cinta tidak terhad kepada media cetak dan media massa, malah khutbah juga dikenalpasti sebagai salah satu mekanisme dakwah yang berkesan untuk menyampaikan mesej cinta yang terkandung dalam Qur'an dan Sunnah. Khutbah khusus bagi mendidik kaum lelaki, kerana lazimnya program-program seperti seminar, kursus dan kelas-kelas pengajian lebih kerap dihadiri oleh kaum wanita. Mesej cinta boleh disampaikan melalui khutbah dan ia boleh dikupas dari pelbagai sudut Ilmu Islam yang merangkumi aqidah, fiqh, tasawwuf, ibadah, syariah dan muamalah. Syaidatun Nazirah (2010) mendapati lebih dari 100 jenis cinta; lebih dari 70 ayat dalam al-Qur'an yang membicarakan soal cinta dan benci serta lebih dari 300 buah hadis Rasulullah SAW yang membicarakan soal cinta dan benci. Membicarakan soal cinta di masjid-masjid dan surau-surau akan dapat menanamkan rasa kecintaan kepada tempat peribadatan dan ini boleh melahirkan remaja yang cintakan masjid dan cintakan ibadah.

Pendidikan kekeluargaan dan kaunseling turut dikenalpasti sebagai mekanisme dakwah yang boleh mendidik pelbagai peringkat masyarakat mengenai cinta. Secara umumnya, keluarga memiliki peranan yang sangat penting dalam mendidik anggotanya jika dibandingkan dengan

peranan institusi atau pihak lain kerana keluarga merupakan lingkungan pertama di mana setiap individu mula berinteraksi. Dari interaksi lingkungan pertama inilah individu memperoleh unsur dan ciri tertentu yang mendasari keperibadiannya. Keluarga juga merupakan simbol atas nilai-nilai mulia seperti keimanan dan kecintaan kepada Allah SWT, cinta kepada kebaikan dan sebagainya (Fachrudin 2011). Sehubungan dengan itu, ayat-ayat cinta dalam Qur'an dan hadis-hadis cinta boleh diterapkan sejak anak-anak kecil lagi. Sebagai contohnya membudayakan pengucapan salam, mengimarahkan majlis-majlis ilmu dan menanamkan kecintaan kepada Allah SWT dan Rasulullah SAW lebih daripada cinta kepada artis-artis ataupun tokoh-tokoh duniawi. Kaunseling kepada golongan remaja dan dewasa pula perlulah diselitkan dengan kefahaman konsep cinta Muslim di mana kefahaman tersebut akan dapat meluaskan horizon pemikiran mereka terhadap cinta dan implikasinya dalam kehidupan (Syaidatun Nazirah, 2010).

Dalam kepesatan teknologi hari ini, para pendakwah moden tidak seharusnya melepaskan peluang untuk mendidik remaja berkaitan konsep cinta Muslim melalui blog dan media sosial. Hasil kajian yang dilakukan oleh Wan Norina et al. (2013) menunjukkan melayari laman web merupakan aktiviti yang paling digemari oleh remaja, terutama dalam melayari laman web untuk bersantai berbanding aktiviti yang melibatkan media massa lain, sama ada televisyen, radio ataupun majalah. Mereka menghabiskan masa lebih daripada tiga jam untuk melayari laman web tersebut dalam tempoh sehari. Justeru, pendakwah yang bijak seharusnya menggunakan laman-laman sesawang dengan memanfaatkan facebook, blogspot, twitter, istagram, ruangan *chatting* atau diskusi maya, telefon bimbit dan sebagainya untuk memupuk dan menerapkan kepada golongan remaja mengenai cinta Muslim. Memandangkan kebanyakan isi kandungan dalam internet memaparkan urusanniaga, informasi, pornografi dan hubungan sosial serata dunia, maka para pendakwah cinta haruslah mengambil peluang untuk menyebarkan ayat-ayat cinta dan hadis-hadis cinta dalam usaha untuk mendidik masyarakat, di samping menyediakan kupasan-kupasan ilmu yang bernas dan bermanfaat.

CINTA KEPADA ALLAH SWT DAN CINTA KERANA ALLAH SWT

Cinta kepada Allah SWT adalah matlamat utama, manakala cinta kerana Allah SWT membuahkan keikhlasan dalam diri. Dengan memahami hakikat kepelbagaian cinta, bahawa terdapat banyak jenis, tahap dan sifat cinta yang ada dalam kehidupan di dunia ini, kita tidak harus terkeliru bahawa matlamat percintaan yang utama sekali ialah untuk

mendapat cinta Allah SWT. Cinta-cinta yang lain akan menyusul dan menyerikan kehidupan kita kerana ia adalah satu keperluan manusiawi yang tidak sewajarnya dipertikaikan kepentingannya. Semua individu Muslim layak untuk menggapai cinta Ilahi, meskipun ia adalah rahsia dan perhubungan hati, jasmani dan rohani di antara hamba dan pencipta-Nya. Mungkin sahaja seseorang itu pernah melakukan dosa besar, akan tetapi rahmat dan pengampunan Allah itu Maha Luas, maka tidak mustahil daripada memiliki status sebagai seorang pendosa, dia boleh bertukar menjadi seorang pencinta Ilahi.

Cinta kerana Allah SWT akan menjadikan kita ikhlas. Contohnya, sebagai anak kita ikhlas mencintai ibu bapa kita dengan mencurahkan kebaktian kepada mereka; sebagai penuntut ilmu kita ikhlas mencintai para pendidik dan ilmu yang ditimba supaya ia berkat dan dapat diguna zaman berzaman; sebagai kekasih kita ikhlas untuk membina rumah tangga dengan insan yang telah diselidiki dan diperhalusi akhlak, budi pekerti dan imannya; sebagai anggota keluarga, kita ikhlas untuk membimbing pasangan hidup, adik-beradik dan saudara mara dengan akhlak islami; sebagai anggota masyarakat kita ikhlas untuk mencurahkan bakti dan kepakaran demi untuk kemaslahatan ummah dan sebagai hamba Allah, kita ikhlas melakukan segala-galanya kerana cinta kita pada-Nya (Syaidatun Nazirah, 2010).

IMPLIKASI KONSEP CINTA MUSLIM

Konsep Cinta Muslim diketengahkan dalam penulisan ini adalah untuk memberikan kefahaman yang jelas kepada masyarakat mengenai cinta yang terkandung di dalam Qur'an dan Sunnah. Kefahaman yang lebih terbuka terhadap cinta boleh membentuk individu yang berfikir waras dan rasional ketika bercinta, berdaya saing dan bermotivasi tinggi serta keikhlasan dalam bercinta yang akan mendatangkan keberkatan dalam kehidupan. Keberkatan inilah yang diperlukan dalam sesebuah keluarga kerana ia akan menjadi pengikat kepada kasih sayang dan cinta di antara suami isteri, kelangsungan cinta di antara ibu bapa dan anak-anak serta keabadian cinta kepada Allah SWT dan Rasulullah SAW. Selain dari itu, kecintaan terhadap ilmu dan kebaikan akan menjadikan kita individu yang berjaya di dunia dan di akhirat serta dijanjikan oleh-Nya dengan keselamatan dan kebahagiaan yang abadi.

Menurut Syaidatun Nazirah et al. (2012), wujud hubungan yang signifikan di antara kefahaman konsep cinta, pemikiran rasional dan akhlak percintaan. Di samping itu, terdapat juga sumbangan yang diberikan oleh ketiga-tiga aspek tersebut. Apabila seseorang individu mempunyai kefahaman terhadap konsep cinta menurut Islam dan tahap pemikiran rasional yang tinggi dalam percintaan, maka ia akan memberi

kesan yang signifikan dan positif kepada akhlak percintaan. Individu yang lebih rasional akan lebih baik akhlak percintaannya, begitu juga bagi individu yang lebih memahami konsep cinta menurut Islam.

Kajian-kajian saintifik mengenai cinta di universiti-universiti tempatan masih terlalu sedikit, lebih-lebih lagi apabila ia dikaitkan dengan ajaran Islam. Tidak dinafikan, cinta banyak dikaji dalam bidang Tasawwuf, tetapi perlulah difahami bahawa persoalan cinta tidak hanya berlegar dalam bidang tersebut sahaja, malahan ia bersifat menyeluruh dan turut menyentuh soal aqidah, fiqh, muamalah dan syariah. Maka dalam hal ini, pengkaji menyeru semua pihak yang terpenggil untuk membantu menangani masalah sosial yang semakin parah pada hari ini untuk bersama-sama memaksimumkan peluang dakwah yang ada untuk mendidik generasi muda mengenai cinta yang berlandaskan Qur'an dan Sunnah.

Dalam kertas pembentangan ini, pengkaji berbesar hati untuk turut berkongsi dapatan-dapatan dari kajian terdahulu mengenai kepelbagaian cinta dari sudut Islam dan Barat (lampiran 1), senarai nama-nama Surah dan ayat-ayat yang berkaitan dengan cinta dan benci (lampiran 2), serta beberapa kompilasi sunnah dan hadis-hadis yang berkaitan cinta (lampiran 3). Dapatan-dapatan ini adalah bukti kepada hujah yang menyatakan bahawa terdapat pelbagai jenis cinta dan sebahagian daripada kepelbagaian jenis cinta tersebut ada dinyatakan dengan jelas di dalam Qur'an dan Sunnah.

KESIMPULAN

“Amal yang paling dicintai oleh Allah ialah beriman kepada Allah, bersilaturrahim dan *amar ma'ruf nahi mungkar*” (HR Bukhari). Cinta kepada Allah SWT akan menjadikan kita individu beriman yang ikhlas, di mana keseluruhan hidup berfokuskan kepada usaha-usaha untuk mendapatkan keredaan-Nya. Mendapatkan keredaan-Nya adalah benteng yang kuat untuk memelihara diri dari kemaksiatan dan menjalinkan hubungan sillaturrahim dengan batasan-batasan akhlak yang dijaga rapi. Manakala cinta kepada Rasulullah SAW adalah manifestasi kepada keimanan yang teguh kepada Allah SWT. Dengan memahami dan menghayati konsep cinta Muslim, diharapkan kita akan dapat melahirkan generasi muda yang mempunyai jati diri dan berupaya untuk memelihara diri dari terlibat dalam masalah sosial

RUJUKAN

- Al-Quran
al-Bayanuni, Mnhd Abu Al-Fath. 2007. *Al-Madkhal ila 'Ilm Al-Da'wah*. Muassasah Risalah Nashirun.
- Fachrudin. 2011. Peranan Pendidikan Agama dalam Keluarga Terhadap Pembentukan Kepribadian Anak-anak. *Jurnal Pendidikan Agama Islam- Ta'lim*. 9(1):1-16.
- Hanisah Osman, Latifah Abdul Majid, Fazilah Idris, Ahmad Munawar Ismail & Haziyah Hussin. 2013. Islamic View on the Muslim Ethics of Loving. *World Applied Sciences Journal*. 27 (10): 1380-1384.
- Hasrizal Abdul Jamil. 2008. *Aku Terima Nikahnya*. Selangor: Galeri Ilmu Sdn. Bhd.
- Hasrizal Abdul Jamil. 2009. *Bercinta Sampai Ke Syurga*. Selangor: Galeri Ilmu Sdn. Bhd.
- Hasrizal Abdul Jamil. 2010. *Murabbi Cinta*. Galeri Ilmu Sdn. Bhd.
- HM Tuah Iskandar al-Haj & Zanariah Sheikh Ahmad. 2002. *Membina Hati Bahagia: Membina Imaginasi Wanita Cemerlang*. Selangor: Karya Bestari Sdn. Bhd.
- HM Tuah Iskandar al-Haj. 2005. *Membina Rasa Cinta*. Selangor: Karya Bestari Sdn. Bhd.
- HM Tuah Iskandar al-Haj. 2008. *Membina Rasa Sayang*. Selangor: Karya Bestari Sdn. Bhd.
- Kamus Dewan. 1996. Edisi ke-3 . Kuala Lumpur: Dewan Bahasa dan Pustaka.
- Kitab-kitab Hadis Rasulullah SAW dan Jami' Shaghir.
- Maszlee Malik. 2007. *Cinta IPT*. Kuala Lumpur. Edusystem Sdn. Bhd.
- Mohd Fadhilah Kamsah. 2005. *Petua`Membentuk Cinta Abadi..* Bentong: PTS Millenia.
- Mohd Fadhilah Kamsah & Noralina Omar. 2006. *Soal Jawab Pra Perkahwinan*. PTS Millenia.
- Nik Abdul Aziz Nik Mat. 2008. *Kisah Cinta dalam Al-Quran*. Selangor. Anbakri Publika Sdn. Bhd.
- Pahrol Mohd Juoi. 2006. *Tentang Cinta*. Kuala Lumpur: Telaga Biru Sdn. Bhd.
- Pahrol Mohd Juoi. 2007. *Satu Rasa Dua Hati*. Kuala Lumpur: Telaga Biru Sdn. Bhd.
- Pahrol Mohd Juoi. 2010 . *Dimanakah Dia di Hatiku?* Selangor: Karya Bestari Sdn. Bhd.
- Siti Isnaniah. 2013. The Representation of Islamic Teaching in The Novels by Habiburrahman El Shirazy. *Jurnal Pengajian Media Malaysia*. 15(1): 119-127.

- Siti Nor Bahyah Mahamood. 2005. *Cakar Harimau: Tips Kebahagiaan Rumahtangga*. Kuala Lumpur: Telaga Biru Sdn. Bhd.
- Siti Nor Bahyah Mahamood.& Zulina Hassan. 2006. *31 Ciri Suami Idaman*. Kuala Lumpur: Telaga Biru Sdn. Bhd.
- Siti Nor Bahyah Mahamood & Siti Nur Fatimah Hasan. *10 Terminal Syurga Rumahtangga*. 2009. Kuala Lumpur: Telaga Biru Sdn. Bhd.
- Syaidatun Nazirah. 2010. *Konsep Cinta Muslim: Mekanisme Menangani Masalah Psikologi dan Sosial* (dalam penerbitan).
- Syaidatun Nazirah Abu Zahrin, Fazilah Idris & Rozmi Ismail. 2012. Kefahaman Remaja IPT Terhadap Konsep Cinta Menurut Islam dan Hubungannya dengan Pemikiran Rasional dan Akhlak Percintaan. *MALIM – SEA Journal of General Studies*. 13: 13-30.
- Utusan Malaysia. *Penganggur rogol anak saudara dipenjara 15 tahun, sebatan*. 7 Mei 2008.
- Utusan Malaysia. *Abang rogol adik akibat gemar tonton filem lucu*. 27 Mei 2008.
- Utusan Malaysia. *Tragedi ngeri mangsa*. 6 Jun 2008.
- Utusan Online. *Mayat bayi ditanam ditemui*. 25 Mei 2010.
- Utusan Online. *Siswazah dipenjara setahun dan denda kerana buang bayi*. 7 Jun 2010.
- Utusan Online. *Remaja perempuan ditahan disyaki buang bayi*. 29 Jun 2010.
- Utusan Online. *Tiga kes buang bayi dilaporkan dalam tempoh 24 jam*. 13 Ogos 2010.
- Utusan Online. *Mayat bayi perempuan ditemui terperangkap dalam sungai*. 15 Ogos 2010.
- Wan Norina Wan Hamat, Zaharah Hussin, Ahmad Fkrudin Mohamed Yusoff & Ahmad Arifin Sapar. 2013. Pengaruh Media Massa Terhadap Penampilan Akhlak Pelajar Islam Politeknik Malaysia. *The Online Journal of Islamic Education*. 1(1): 17-27.
- Zulkiple Abd Ghani. 2001. Komunikasi Islam Sebagai Komunikasi Alternatif. *Jurnal Islamiyyat*. 22: 79- 89.